

12536 *CORRECCIÓN de erros da Lei 14/2000, do 29 de decembro, de medidas fiscais, administrativas e da orde social.* («BOE» 155, do 29-6-2001.)

Advertidos erros no texto da Lei 14/2000, do 29 de decembro, de medidas fiscais, administrativas e da orde social, publicado no «Boletín Oficial del Estado», suplemento número 3 en lingua galega, do 30 de xaneiro de 2001, procédese a efectuar as oportunas modificacións:

Na páxina 212, segunda columna, artigo 6, Un, primeiro parágrafo, liña 4.^a, onde di: «a cesión de dereito», debe dicir: «a cesión do dereito».

Na páxina 222, primeira columna, artigo 8, Primeiro, Vintetrés, Oitava, Dous, b), onde di: «35 por 1000», debe dicir: «35 por 100».

Na páxina 230, segunda columna, artigo 13, artigo 15, Dous, terceira liña, onde di: «obligatoria, de acordo», debe dicir: «obligatoria de acordo».

Na páxina 247, primeira columna, artigo 44, Dous, artigo 89, 3, segundo parágrafo, terceira liña, onde di: «de forma individualizada e as entidades públicas», debe dicir: «de forma individualizada, as entidades públicas».

Na páxina 247, segunda columna, artigo 44, Dous, artigo 91.1, sexta liña, onde di: «de explotación e de capital», debe dicir: «de explotación ou de capital».

Na páxina 249, primeira columna, artigo 47, artigo 56.1, última liña, onde di: «que aquela sinale», debe dicir: «que aquel sinale».

Na páxina 287, o procedemento que aparece en cuarto lugar, relativo á «exclusión da prestación farmacéutica do sistema nacional de saúde...», debe suprimirse, ó coincidir co procedemento que figura no quinto lugar na devandita páxina.

Na páxina 291, disposición adicional trixésimo sexta, primeiro parágrafo, terceira liña, onde di: «a non esixibilidade do imposto», debe dicir: «a non esixibilidade no imposto».

12616 *REAL DECRETO LEI 12/2001, do 29 de xuño, polo que se aproban medidas fiscais urxentes en materia de retencións e ingresos á conta do imposto sobre a renda das persoas físicas e do imposto sobre sociedades.* («BOE» 156, do 30-6-2001.)

En recentes sentencias do Tribunal Supremo anuláronse determinados preceptos dos regulamentos do imposto sobre sociedades e do imposto sobre a renda das persoas físicas en materia de retencións que obrigan a introducir modificacións urxentes na normativa fiscal para que, en consonancia co mandato do alto Tribunal, quede garantido o cumprimento das esixencias derivadas dos principios de legalidade e seguridade xurídica.

No ámbito do imposto sobre a renda das persoas físicas, as sentencias do Tribunal Supremo do 22 e 23 de marzo de 2001 anuláron o parágrafo 2.^o do punto 1 do artigo 75 do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, que establecía no 40 por 100 a porcentaxe de retención aplicable ás retribucións percibidas polos administradores e membros de consellos de administración.

Resulta preciso, como consecuencia destas sentencias, establecer unha nova porcentaxe de retención e ingreso a conta do imposto sobre a renda das persoas

e membros dos consellos de administración, minorando en cinco puntos porcentuais o tipo de retención aplicable ata agora, deixándoo fixado no 35 por 100, con redución á metade, se se obteñen en Ceuta ou Melilla, cando resulte procedente a deducción prevista no artigo 55.4 da Lei do imposto.

Polo que respecta ó imposto sobre sociedades, a sentenza do Tribunal Supremo do 10 de marzo de 2001 anulou o epígrafe 3.^o do artigo 4 do Real decreto 2060/1999, do 30 de decembro, que modificou o punto 3 do artigo 62 do Regulamento do imposto sobre sociedades, aprobado polo Real decreto 537/1997, do 14 de abril, que establecía no 25 por 100 a porcentaxe de retención aplicable á cesión do dereito á explotación da imaxe, ou do consentimento ou autorización para a súa utilización.

Como consecuencia desta sentenza, cómpre establecer unha nova porcentaxe de retención e ingreso á conta do imposto sobre sociedades para as rendas procedentes da cesión do dereito á explotación da imaxe, ou do consentimento ou autorización para a súa utilización, que se fixa no 20 por 100, igual ó establecido no imposto sobre a renda das persoas físicas, co que se consegue a uniformidade nas porcentaxes de retención destes dous impostos.

A necesidade de dotar de seguridade xurídica os contribuíntes respecto ás retencións e ingresos á conta que soportan, e as empresas que resultan obrigadas a practicalos, así como as esixencias derivadas do cumprimento do orzamento de ingresos coa finalidade de garanti-la política económica de estabilidade orzamentaria, son circunstancias nas que concorre, pola súa natureza e finalidade, a extraordinaria e urxente necesidade que require o artigo 86 da Constitución para acudir á figura do real decreto lei, co obxecto de que as medidas adoptadas produzan os seus efectos de maneira inmediata.

Na súa virtude, en uso da autorización contida no artigo 86 da Constitución, por proposta do ministro de Facenda e logo de deliberación do Consello de Ministros na súa reunión do día 29 de xuño de 2001,

DISPONGO:

Artigo primeiro. *Modificación do artigo 83 da Lei 40/1998, do 9 de decembro, do imposto sobre a renda das persoas físicas e outras normas tributarias.*

Con efectos a partir da entrada en vigor deste real decreto lei, modifícanse a rúbrica do artigo 83 da Lei 40/1998, do 9 de decembro, do imposto sobre a renda das persoas físicas e outras normas tributarias, e o punto 1, parágrafo segundo, do dito artigo, que quedarán redactados da seguinte forma:

«Artigo 83. Importe dos pagamentos á conta.

A porcentaxe de retención e ingreso á conta sobre os rendementos do traballo que se perciban pola condición de administradores e membros dos consellos de administración, das xuntas que fagan as súas veces, e demais membros doutros órganos representativos, será do 35 por 100. Esta porcentaxe de retención e ingreso á conta reducirase á metade cando se trate de rendementos obtidos en Ceuta ou Melilla que teñan dereito á deducción da cota prevista no artigo 55.4 desta lei.»

Artigo segundo. *Modificación do artigo 146 da Lei 43/1995, do 27 de decembro, do imposto sobre sociedades.*

Con efectos a partir da entrada en vigor deste real decreto lei, engádese un novo punto 6 no artigo 146,

«Retencións e ingresos á conta» da Lei 43/1995, do 27 de decembro, do imposto sobre sociedades, coa seguinte redacción:

«6. A porcentaxe de retención e ingreso á conta sobre as rendas procedentes da cesión do dereito á explotación da imaxe ou do consentimento ou autorización para a súa utilización, será do 20 por 100.»

Disposición derradeira única. Entrada en vigor.

Este real decreto lei entrará en vigor o día seguinte ó da súa publicación no «Boletín Oficial del Estado».

Dado en Madrid o 29 de xuño de 2001.

JUAN CARLOS R.

O presidente do Goberno,
JOSÉ MARÍA AZNAR LÓPEZ

MINISTERIO DA PRESIDENCIA

12626 *REAL DECRETO 746/2001, do 29 de xuño, polo que se establecen as condicións de sanidade animal aplicables ós intercambios intracomunitarios e ás importacións de carnes frescas de aves de curral procedentes de países terceiros. («BOE» 156, do 30-6-2001.)*

O desenvolvemento da avicultura, actividade gandeira de innegable importancia e que constitúe unha sólida fonte de ingresos para a poboación agraria, require da harmonización das normas de policía sanitaria que regulan os intercambios intracomunitarios e as importacións das carnes frescas de aves de curral.

Só a través do exercicio constante de controis veterinarios sobre as granxas de reprodutores e sobre as importacións de carnes de aves procedentes de países terceiros se pode conseguir unha evolución harmónica dun sector que representa un importante papel na alimentación humana actual.

Estes aspectos foron tidos en conta na redacción e posterior publicación da Directiva do Consello 91/494/CEE, do 26 de xuño, sobre as condicións de policía sanitaria ás que deben axustarse os intercambios intracomunitarios e as importacións de carnes frescas de aves de curral procedentes de países terceiros, incorporada ó noso ordenamento xurídico no Real decreto 1322/1992, do 30 de outubro, polo que se establecen as condicións de sanidade animal ás que deben axustarse os intercambios intracomunitarios e as importacións de carnes frescas de aves de curral procedentes de países terceiros.

A evolución dos coñecementos científicos sobre o virus da enfermidade de Newcastle e o establecemento de normas uniformes de emprego de vacinas contra esta enfermidade, ademais do desenvolvemento de normativas comunitarias específicas de loita e erradicación das principais enfermidades aviarias, enfermidade de Newcastle e influenza aviaria, propician a publicación do Real decreto 362/1995, do 10 de marzo, que modifica o anteriormente citado e que incorpora ó noso ordenamento a Directiva 93/121/CEE, do Consello, do 22 de decembro, que modifica a Directiva 91/494/CEE.

A Directiva 91/494/CEE, que xa foi modificada pola incorporación na definición das aves de curral, das «struthioniformes», representados na súa gran maioría polas avestruces, é novamente modificada pola Directiva

1999/89/CE, do Consello, do 15 de novembro, o contido da cal se incorpora agora á nosa lexislación.

En definitiva, este real decreto incorpora a Directiva 1999/89/CE, do Consello, do 15 de novembro, pola que se modifica a Directiva 91/494/CEE, pola que se refunde o contido do Real decreto 1322/1992 e as súas posteriores modificacións.

Na súa virtude, por proposta do ministro de Agricultura, Pesca e Alimentación e da ministra de Sanidade e Consumo, de acordo co Consello de Estado e logo de deliberación do Consello de Ministros na súa reunión do día 29 de xuño de 2001,

DISPONGO:

CAPÍTULO I

Disposicións xerais

Artigo 1. *Ámbito de aplicación.*

Este real decreto establece as condicións de sanidade animal ás que deben axustarse os intercambios intracomunitarios e as importacións de carnes frescas de aves de curral procedentes de países terceiros.

Artigo 2. *Definicións.*

Para efectos deste real decreto, enténdese por:

a) Aves de curral: as galiñas, pavos, galiñas pintadas, patos, ocas, paspallás, pombas, faisáns, perdices e aves corredoras («ratites») criados ou mantidos en cativerio para a súa reprodución, a produción de carne ou de ovos para consumo ou a subministración de especies de caza para repoboación.

b) Aves para matadoiro: as aves de curral directamente conducidas ó matadoiro para seren alí sacrificadas o antes posible e, como moi tarde, no prazo das setenta e dúas horas seguintes á súa chegada.

c) Carnes: tódalas partes das aves de curral aptas para o consumo humano.

d) Carnes frescas: tódalas carnes de aves de curral, incluídas as carnes envasadas ó baleiro ou en atmosfera controlada, que non fosen sometidas a ningún tratamento distinto do frío para garantirla súa conservación.

e) País terceiro: o país non membro da Unión Europea autorizado para o comercio con esta.

f) Autoridade competente: os órganos competentes das comunidades autónomas para o mercado interior e os ministerios de Agricultura, Pesca e Alimentación e de Sanidade e Consumo, para os intercambios con países terceiros e para as oportunas comunicacións á Comisión das Comunidades Europeas, no ámbito das súas respectivas competencias.

g) Veterinario oficial: o veterinario designado pola autoridade competente.

CAPÍTULO II

Intercambios intracomunitarios

Artigo 3. *Normas xerais.*

1. Para poder ser obxecto de intercambios intracomunitarios, as carnes frescas deberanse ter obtido a partir de aves de curral que:

a) Permanecesen desde o seu nacemento en territorio da Comunidade ou fosen importadas de países terceiros de conformidade coa normativa de importación de aves de curral e de ovos para incubar procedentes de países terceiros.